

Thursday, May 14, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

NGOPA TOTAL BANDH

NH 102B Package 2 hna a chhiat lutuk avanga lungawi lo, Ngopa JAC chuan tukin zing dar 7 atang khan Total Bandh an kalpui ñan a, mipui thlawp a hlawh hle.

Total Bandh neih chhung hian Ngopa kaltlang Manipur kawngpui chu dan pin a ni a, lirthei paltlang lui an awm loh thu duty ten an sawi, tual chhungah dawr inhawng an awm lova, duty te bak khawlaiah hmuh tur an awm lo a ni.

Ngopa Joint Action Committee hnen atanga kan palai thudawn danin vawiin total bandh hian awmzia a neih loh chuan naktuk May 15 (Zirtawpni) atangin tiam chin awm lovin kawngpui hi an dang chat dawn a ni.

National Highway B102 hi Mizoram leh thenawm state Manipur inkalpawhna kawng pawimawh tak a ni a, he kawng siamtha tur hian Ngopa Joint Action Committee chuan thuneitute vawi tam tak anlo ngen tawh a, an ngenna in awmzia a neihloh avang hian Total Bandh hi huaihawt a ni a, kawng dan hian mipui thlawp a hlawh hle a, mipui vei vak hmuh tur an awm rihlo a ni. Hetihlai hian he kawng paltlang tum zin mite tangkhang an awm niin Akashvani News in thu a dawng a ni.



REFUGEE INFLUX

Myanmar sipaiten mipui sipai kut atanga Khawmawi (Tiau) chhuhsak an tum ni-a sawi avangin tunlai hian Zokhawthar-ah raltlan an luh belh mek a. May ni 12 thleng khan mi 811 an lut tawh a, nimin lamah mi 11 luh belh lehin, tunhnaia raltlan Mizorama lut thar chu mi 822 an tling tawh a ni.

Zokhawthar Br. YMA hrulaitute sawi danin raltlante hi Zokhawthar Police leh Assam Rifles-in lo dawngsawngin an chhinchhiah a, YMA in an awmna tur an ruahmanpui thu an sawi a. Raltlan lo lut zinga a tam zawk chuan an chhungte an bel a, in luh tur zawng pawh an nual tih an sawi a. Tunah hian Zokhawtharah raltlan sang 7 vel awm sa an awm mek a, hei hi Zokhawthar mipui aiin an tam zawk tih sawiin, raltlan awm sa an tam avang hian tun dinhmunah chuan buaipui ngai an awm hran lova, an chhungte belin an awm deuh vek tih an sawi.

Zokhawthar Br. YMA hrulaitute chuan, ratlan hi a hma anga a hlawma lo lut an ni lova, buaipui pawh an harsa rih lo tih an sawi a. Hetihrial hian indo thawm a awm reng avangin a nawlpuia lo luh hun a awm theih avangin inrin lawk a ngaih thu an sawi a ni.



FLORENCE NIGHTINGALE AWARDEE

Florence Nightingale Award 2026 dawngtu Pi Lalenthangi Hnamte Health Worker chu vawiin khan Lengpui Airport ah ropui taka hmuah a ni.

Mizoram Health Multipurpose Service Association (MHMSA) chuan vawiin khan an member Pi Lalenthangi Hnamte chu Lengpui Airport ah an lo hmuak a, Tlabung Welfare pawhin lo hmuakin chawimawina hlan a ni.

Health Worker Tuichawng AHWC a thawk laiin Florence Nightingale Award 2026 dawngtu Pi Lalenthangi Hnamte chuan chawimawina a dawng chu lawmawm atih thu sawiin amah duhsaktute chungah lawmthu a sawi a ni.

Byte of Pi Lalenthangi Hnamte

Vawiin vek hian Ayush Directorate ah Chawimawina neih niin Health & Family Welfare Department chuan Secretariat Administration Department Conference Hall ah lawmna hun a buatsaih a, Florence Nightingale Award dawngtu Pi Lalenthangi Hnamte hi Mizoram atanga dawng 18 na a ni.



UPSC GROOMING SCHEME

All India Service leh Central Service-a Mizote an luh theihna tura Mizoram Sorkar-in UPSC Grooming Scheme a duan chu Education Minsiter, Dr. Vanlalhlana'n a hawng.

UPSC Grooming Scheme hi YMC kaltlanga ruahman niin, nikum khan tifel a ni tawh a, sum an dawn lawk loh avangin nimin khan hawn theih chauh a ni a, tuna kalpui turah hian nikuma HSLC Exam-a total mark 405 hmu chin tan dil theih a ni a. A diltute chuan MBSE buatsaihna hnuai written exam leh personal interview an neih hnuah mi 10 thlan chhuah an ni.

UPSC Grooming Scheme kalpui tur hian Mizoram Coaching Centre hrang hrangte proposal theh luh zingah hmala turin MS Academy, Khatla chu thlan a ni a. He scheme hi kum tin kalpui tum a ni a, thlan chhuahte chu kum 5 chung tuaihriam an ni ang . UPSC exam tura naupanlai atanga rilru leh taksa lo insawizawina scheme a ni.



MIZORAM SCIENCE AWARD

Mizoram Science Award hmasa ber chu Dr LN Tluanga hnenah hlan a ni.

Mizoram Science Award hi Mizote zinga Science leh a kaihnawih lama khawtlang leh ram tana hnuhma nei tha te, scientific research lama mi hming tha leh thawhhlawk te hnena hlan thin tura Mizoram Science Society-in a duan a ni a, he Award hian sumfai Rs. 50,000 a keng tel a ni.

Mizoram Science Award hmasa ber dawngtu Dr. L.N. Tluanga, Mission Veng chu a taksa a chak lo deuh avangin Aizawl Hospital-ah enkawl mek a ni a, Mizoram Science Society hruaituten Hospital-ah kal chilhin, Award hi an hlan a ni.

Mizoram Science Award dawngtu Dr. LN Tluanga hi kum 1933 khan Bukpui khuaah a piang a, kum 1955-ah Scottish Church College atangin B.Sc Mathematics chu Distiction-ah a pass a, kum 1974-ah Gauhati University atangin PhD a zova, Mizo zinga Mathematics subject-a PhD nei hmasa ber a ni.



MONSOON STOCK

Supply Department chuan kumin fur chhung atana Mizoram mamawh tur buhfai chhekkhawl ani tawh an ti a, Supply Centre hrang hrang hmun 70 ah buhfai mamawh dah vek tawh anih thu an sawi.

Food, Civil Supplies & Consumer Affairs Department thuchhuah tarlan danin kumin Fur khawchhiat laia khaw thenkhat tlawhpawh harsa leh ei leh bar lakluh harsatna thin khua ten buhfai an tlakchham loh nan buhfai chhekkhawl an kalpui a ti a, Heng khaw hrang hrangten furpui chhunga anmahni chawmtu Supply Centre 70 (sawmsarih)-ah an mamawh tur zat buhfai 1,66,655.90 qtls.(quintal nuai khat singruh sangruk zaruk sawmnga panga leh kg. sawmkua) chu thlen kim a ni tawh an ti a, thingtlang hmun kilkhawr zawka chengte Furpui lo thleng turah harsatna a awm dawnlo tih an sawi.

